

Muki Bricht 2024/2025

Zum erste Mol wärde mir Leiterinne ohni eignigs Chind i de Halle stoh und sind sehr gspannt uf die neu Erfahrig. En wieteri Veränderig isch, dass mer uf Afrog vo zwoi Mumpfer Fraue sAmeldefenster nach Igang vo de lheimische Rückmeldige göffnet händ. So sind neu i dem Johr au no 4 Teilnehmer us Mumpf debi und us spontaner Gegebeheit no öpert us Schupfert, es altbekannts Chorballergsicht.



Mir freue ois, dass i dem Mukijohr ingsamt 19 Kinder debi sind. Us dem Grund, und au will mer jetzt als Leiterinne chli flexibler chönne si, händ mir ois entschiede, zwoi Turnstunde abzbiere. Für ois bedüetet das, dass mer neu vom 8.00 – 11.00i i de Halle stöhnd.

Es isch ganz en ungewohnti Situation mit knapp 10 Kind pro Gruppe und ihrne Begleiter i de Halle zstoh. Zum eine isch es einiges rühiger, aber sChind het so au viel meh Muet, öpis uszprobiere, was vorher weniger gmacht hätt, wills sich vellicht eher chli unter Druck gsetzt gefühlt het, sowie bliebe so au mol en Moment wo sChind mit ihrem Mami, Papi, Gotti oder was au immer cha neh zum Kuschele.

Au i dem Johr hämer wieder am 6. September 2024 gstartet, doh mir das eigentlich super gfunde händ, es paar Turnstunde vor de Herbstferie meh zha.

Zum diesjöhrige Thema hämer ois für de Siebeschlöfer entschiede. Mir händ es Lientuech in e riese grossi Schnuffeldecki verwandelt, wo ois i jedere Turnstund irgendwie begleitet sigs as Sprungtuech, zum drufhocke und zoge zwärde, as Zält und no vielem meh. Turnstunde wärde aber nach wie vor nach de Kriterie vom Mukibär gstartet. Es git es Istimme im Chreis, deno es Ufwärme, gfolgt vo verschiede Turnpöste und zum Schluss düämer no öpis zum Usklinge turne.

De Siebeschlöfer und sini Fründe begleite ois durs Turnjohr. Verschiednigs hämer scho erläbt, vom Träffe im Wald, zu Halloween bis zu de Bäckerstube. Sogar de Samichlaus isch ois no cho bsueche.

Als Leiter ischs immer wieder toll zgseh, was dChind i dem Mukijohr für en Entwicklig mache, au de Unterschied vom chline Mukichind zum grosse. I dem Johr fällt au uf, dass mer die Erwachsene richtig guet chönne motiviere zum sälber mitzurne und au richtig freud dra händ.

Hüt hämer wieder afo turne und freue ois uf wieteri spannendi Turnstunde, wo mer mit de Waldtier no dörfe erläbe. Es wird sicher no Fasnacht gfieret oder emol id Unterwasserwält itaucht.

Am 30.03.2024 beende mir oises Mukijohr. Neu findet das am Sunntig mit eme abschliessende Brunch statt. Oisi Idee wäri, das in Form vomene Familieturne abzbiere.

Simer gspannt, wie das Anklang findet und duregfüährt werde cha.



Mit ganz liebe Grüess fürs Mukiturne

Vanessa, Larissa & Nadja